



UNIVERSITÄTS-
BIBLIOTHEK
PADERBORN

Universitätsbibliothek Paderborn


Monumenta Paderbornensia

Ferdinand <Paderborn, Bischof, II.>

Amstelodami, 1672

Rema Ad Confluentes Warnaee Et Visurgis, Pagus Ravensbergici Comitatus.

urn:nbn:de:hbz:466:1-7830



R E M A

AD CONFLUENTES WARNÆ ET VISURGIS,
PAGUS RAVENSBURGICI COMITATUS.

MEMORIAE. SACRUM

INCLYTA. FRANCORUM. FASTIS. UBI. WARNA. VISURGIS
AMNE. RECEPTA. SUÆ. NOMINA. PERDIT. AQUÆ
SAXONE. PIPINUM. FUSO. SPECTAVIT. OVANTEM
REMA. TRIUMPHALI. FERRE. TROPÆA. MANU
HILDIGARIQUE. NECI. VICTRICIA. CASTRA. SECUTI
FRANCIGENAS. MOESTIS. ILLACRYMARE. MODIS
FORTIS. ET. EXEMPLIO. CAROLUM. GENITORIS. AVIQUE
SAXONICÆ. VALIDAS. FRANGERE. GENTIS. OPES
TALIBUS. ILLISTRIS. TITULIS. PLUS. REMA. SUPERBIT
QUAM. QUOD. RHEMORUM. NOBILE. NOMEN. HABET

FERDINANDUS. DEI. ET
APOSTOLICÆ. SEDIS. GRATIA. EPISCO-
PUS. PADERBORNENSIS. COADJUTOR
MONASTERIENSIS. S. R. I. PRINCEPS
COMES. PYRMONTANUS. ET. LIBER. BA-
RO. DE. FURSTENBERG

REMÆ. AD. CONFLUENTES. WARNAE. ET. VISUR-
GIS. SITÆ. PIPINI. EJUSQUE. FILII. CAROLI. M
FRANCORUM. REGUM. SAXONICIS. EXPEDITIO-
NIBUS. AN. DCCLIII. ET. AN. DCCLXXXIII. CELE-
BRIS. PAGI. MEMORIAE

M. H. P

L

NO.



N O T A E.

I. INCLYTA FRANCORUM FASTIS.] Post Romanas monumenta procedimus ad Francica & Saxonica. Quare de utraque gente pauca præmonere, non inconveniens ingratumve fore censuimus. Nec enim ut de Romanis, ita de Francorum Saxonumque origine constat; neque eâ haetenus quicquam obscurius fuit, quæ nunc à tot scriptoribus pertractata explicataque certius lumen accepit, ut qui simus, & quibuscum gentibus bellatum sit, & à quibus hæc monumenta postoris relicta sint, planius affirmare & profiteri liceat.

Franci populus, qui sub Francico nomine bella gessit contra Romanos, primùm audiri & innotescere coepit Valeriano & Gallieno Impp. circa annum Christi cc. xxiiii. Ideò nec apud C. Julium Cæsarem, Tacitum, Velleium, Plinium, Strabonem, Dionem, Ptolemæum, ceterosque priscos scriptores Francorum mentio. Celebre autem Francorum nomen apud posteriores historicos ac scriptores, Aurelium Victorem, Eutropium, Ammianum, Vopiscum, & quotquot Augustam Cæsarum historiam scripsierunt. Inde apud Zosimum, Procopium, Agathiam, Aethium, D. Hieronymum, Claudianum, Ausonium, Gregorium Turonensem, Apollinarem, ac ceteros auctores; quemadmodum id Franci scriptores Tillius & Valesius, Nuenarius Comes, Cluverius & Pontanus, & quotquot Francorum originem tradiderunt, probè agnoscunt. Ex quibus erudití passim viri deducunt, ante tempora Gallieni nullum extitisse certum populum nationemve Francorum nomine insignitam. Sanè si qua gens Francica extitisset ante Gallieni imperium, non eam omisisset Tacitus, tam accuratus Germanarum gentium scriptor, non cæteri historici & geographi.

Ideò gentis Francicæ origo haetenus multum obscura latuit, multisque fabulis aspersa, & erroribus obnoxia fuit. Reperies enim primùm, qui cum Francicis aliquot scriptoribus, & Tri-

themio





UNIVERSITÄTS-
BIBLIOTHEK
PADERBORN





UNIVERSITÄTS-
BIBLIOTHEK
PADERBORN

themio Hunibaldi fabulas secuti, Francos à Trojanis reliquiis, & ex Pannonia deducunt ad Rhenum; atque hi auctores, ut fabulam fabulâ augeant, tradunt Francos, postquam diu in Pannonia resedissent, conditâ etiam Sicambriâ urbe, Valentiniani Imperatoris rogatu domuisse Alanos, ob id tributo ab Imperatore liberatos, ac Francos, hoc est, *feroces Atticâ* lingua primùm appellatos esse, cùmque Romani rursum tributa exigèrent, rebellasse, & ad Rhenum penetrasse. Egregii sanè historici, quasi Valentiniani primùm ævo Franci exorti sint. Et quæ Attica vox Francos sonat? Et tamen hæc opinatio Sigebertum, Paulum Æmilium, & plures celebres historicos abduxit, tanquam gentem Francicam nobiliorem facturi essent, si ab exterris magis quam ex Germanis origines arcesserent; Similiter tamen hi auctores fateri coguntur è Germania prodiisse Francos, qui rupto Rheni limite Gallias invaserint. Inde alii Francorum quidem gentem ab antiquissimis Romanorum temporibus in Germania extitisse asserunt, sed parvam invalidamque latuissimæ, donec aucta sensim populis atque armis emerserit, & ad Rhenum proruperit, ideo Tacito incognitam fuisse. Sed tam faciliè hæc refelluntur, quam asseruntur, nullo gentis ejus tam diu latentis indicio in medium allato. Haud dissimili commento Turnebus Francos ex Scandinavia educit à Firassis populis, Ptolemæo memoratis. Genebrandus lib. 2. & 3. chron. Stephanus Forcatulus l. 5. de Imp. & Philosophia Gall. Bodinus in meth. hist. cap. 9. Francos primâ origine Gallos fingunt, qui inter cæteras migrationes gentium sedes in Germania & Pannonia habuerint. Ibi verò postquam à Romanis acerbâ premerentur servitute, rediisse in Gallias ad natale solum. Nova rursum figmenta ingenii. Nam ubi hi Franci Gallicæ nationis tam diu latuerint, nemo ex his auctoribus docere potest, nec quales fuerint, Boiine, an Tectosages, an Scordisci, ne inter ipsos quidem convenit.

Alii denique Francos ex prima gentis origine ex Franconia deducunt. Plausibilis hæc multorum sententia fuit, sed jam dum ex suis erroribus recta; quando Franconia Alemannicæ

pars cognita, & à Clodoveo Franc. Rege, aut filio ejus Theodo-
rico Austrasie Rege, devictis Alemannis, cum omni ea regione
ad Francorum regnum accessit. Nec antè Francorum nomen ibi
auditum, tametsi Franci fortè jam antè ad Nicrum aliquando
proruperant. Sed & diu ante hæc tempora Francorum nomen ce-
lebre inter Rhenum, Visurgim, atque Albim, priusquam arma
Francorum in eas regiones penetrarent. Nec minus antiquitatis
periti hæc explodunt, quam qui ex Mæotide palude, aut Panno-
nia Francos evocant, aut mutato Sicambrorum nomine, à Fran-
co quodam fictitio Trojanæ stirpis Rege appellatos scripsere.

Illa demum certa & explorata sententia est, veterem Fran-
ciam inter Rhenum, Visurgim, atque Albim requirendam es-
se. Nec alibi magis quam in ipsa Westphalia, vicinisque ad I-
falam & Frisiae oras, aut Rheni ostia regionibus Francos repe-
riri. Hæc priscorum omnium scriptorum, à quibus Francorum
primùm nomen & bella cum Romanis nobis sunt consignata,
una consensio est. Neque de hac re quisquam integrè judicare
poterit, ut rectè Cluverius pronuntiat, nisi in omni veteri Ro-
manorum historia probè versatus sit. Quod cùm nostro demum
ævo viri docti & antiquitatis periti præstiterint, (quorum ma-
gnus apud nos est numerus,) in hanc nobiscum sententiam con-
venerunt, Trithemius lib. 3. c. 20. de orig. Franc. Nuenarius
comes præfat. in Eginhardum, Rhenanus lib. de Germ. cap. de
Francis, Althamerus in Tacitum, Reineccius de Orig. Sax. Had-
rianus Junius in Batavia, Miraeus in Chron. Gelenius in sacr.
Colon. & Plectrude, Browerus lib. Antiq. Trevir. ad An. Chri-
sti CCCLXXXVIII. Crumbachius in historia D. Ursulæ, Petavius
in Rat. temp. lib. 6. c. 13. Bucherius in disp. hist. & Belg. Ro-
mano, Rivius dec. 1. l. 1. Cluver. l. 3. c. 20. Pontan. de Orig.
Franc. Chyträus in Prolog. Horrion in Paneg. Paderb. Valesius
in prefat. Gest. Franc. Res ita se habet. Postquam bellicosi in-
tra Rhenum & Visurgim populi, Sicambri, Bruœteri, Tenetæ-
ri, Ulipetes, Catti, Angrivarrii, Chauci, Chamavi, Cherusci,
Marsi, Chattuarrii sive Attuarii, Frisii, Tubantes, cæterique
jam inde à C. Julii Cæsaris ævo continua cum Romanis bella
gessis.

gesiſſent, nunc victores, nunc vieti, veritique ne toti in Romanorum servitutem venirent, facta conſpiratione in unum foedus & belli societatem pro insita gentis libertate convene- runt, ſumptuoque ad id *Frango* nomine, tanquam libertatis signo (quod *Francion* liberum gentis lingua hominem ſonat) tot ſæculis acerrima bella aduersus Romanos gesserunt, exciti cum primis Alemannorum exemplo, qui jam ſaepius in Gallias excuſio Romanorum jugo irruperant: atque ex his, quos di- ximus, populis conflatam eſſe hanc belli societatem evincunt priſci scriptores. Nam Sicambros Claudianus & Apollinaris, aliique Francos toties compellant, Bructeros Sulpitius Alexander, Nazarius & Eumenius in Panegyricis, Chaucos & Che- rufcos Claudianus, Chamavos Ausonius, Cattos Sulpitius A- lexander, Attuarios Marcellinus, Frifios Panegyricus Constant. M. dictus, Salios Marcellinus denuo, & Zofimus, aliique scri- ptores inter Francos numerant. Adhibetur in hanc rem tabu- la itineraria circa annum ccccxxx. conſcripta, in qua à Rheni oſtio ascendendo ad dexteram ripam, leguntur hi populi, *Chau- ci*, *Ampſivarii*, *Cherufci*, *Chamavi*, qui & *Franci*; ſequitur in ea- dem ripa magnis literis ſcriptum: FRANCIA. Inspiciantur ve- tera monumenta, interque hæc vetus lapidis inſcriptio à Ru- perto detecta, quæ Divitense munimentum seu Tuitium ex adverſa Agrippinæ ripa à Constantino M. in terra Francorum ſtructum exhibet. Extat apud Spanhemium de praefant. & uſu numiſim. diſſert. 8. pag. 750. ē cimel. Reg. Gall. & Card. Leo- pold. Med. erutus aureus Constantini M. nummus, qui ex una parte Constantini effigiem signat, ex altera tropæum, jacen- tem videlicet mulierem, conſuetum debellatae provinciæ ſym- bolum, hac inſcriptione: GAUDIUM ROMANORVM. In- fra, FRANCIA. Ubi verò hæc Francia requirenda ſit, do- cent nos res geſtae Constantini M. & pons ab eo Cæſare apud U- bios Rheno inſtratus, per quem exercitus in Francos traduētus.

Pervolvantur omnes Historici, Panegyrici, Poëtæ, qui vete- rum Francorum res geſtas nobis tradiderunt: haud alibi veteres Francorum ſedes magis reperientur, quam intra Rhenum &

Visurgim, quæ regio post Westphalia dicta est. Quapropter Sido-
nius Apollinaris Francicæ regionis flumina perscribens, Va-
halim, Vidrum, Visurgim atque Albim introducit, ac Vaha-
lim quidem, quod eâ tempestate Franci Salii Rhenum trans-
gressi illas Bataviæ Belgicæque oras invaserant. Fines adeò ve-
teris Francicæ, ne quis in his anceps hæreat, descripsit D. Hiero-
nimus, in vita D. Hilarionis: *Inter Saxones & Alemannoſ gens
extat, non tam lata, quām valida, apud historicos Germania, nunc
verò Francia vocatur.*

Hæc paucis de Francorum origine & veteri Francia, quæ à
multis multò explicatiùs traduntur, nos brevitatis, & hujus in-
cise, per modum commentarii, ſcriptionis memores, verbo
commonſtrare voluiſimus, Francos à prima stirpe ſua fuifſe Ger-
manos, eosque indigenas, quales plerique Germani Taciti ju-
dicio cenſentur, ac populi qui diversis ante nominibus fereban-
tur, ii haud ſecus quām Alemani in idem Francicum nomen
& belli ſocietatem pro libertate convenerunt. Ac nihil jam cer-
tius, quām Francos hoſce non fuifſe Germanos ſuperiores, ut
ii volunt, qui ex Franconia & ſuperiori Germania deducunt;
ſed inferioris Germaniæ inter Rhenum & Viſurgim incolas, eâ
potiſſimū regiōne, quæ Westphaliæ nomen obtinet. Atque
hi inferioris Germaniæ Franci rurſum duplices; alii abſolutā
voce Transrhenani; alii cum additamento voceſ Salii, quorum
frequens mentio apud ſcriptores; iidemque Transrhenani,
haut ſecus quām omnes Franci à prima origine ſua, quibus Sa-
liorū nomen adhaeſit indutum, quod Salæ ſeu Isalæ fluminis
in Westphalia orti incolæ fuerint. Ii post Rhenum transgressi,
Galliam ac Romanum ſolum ut cæteri Franci occupavere. In-
de libro Notitiæ Imperii Salii Gallicani, & Salii coniuncti Tu-
bantibus referuntur, ubi trans Rhenum nativas ſedes incolu-
re, ſecus quām quidam cenſuerunt, cum Chifletio & Ponta-
no, qui Francos in Ansivarios & Salios diſiſerunt, illos Trans-
rhenanos, hos Cifhenanos afferendo, quibus poſtremū ac-
cessit Bollandus in vita Sigeberti Regis ad primum Febr. diem.
Omnium enim Francorum nativa origo Germania Transrhe-
nana.

nana. Sanè Constantinus Cæsar, ac filii Cæsares, Julianus, aliquique exinde Imperatores, ac Romani duces, qui in iis Galliæ regionibus oppugnarunt Francos, non ex patro, sed alieno solo, quod transito Rheno infederant, toties rejecerunt, nec aliter comperiet, qui Marcellinum aliosque eorum temporum scriptores sincerè expenderit, quæ disceptatio hoc loco aliena est.

Hinc omnis Francia quadripartitò traditur. Prima Transrhænana, eaque antiquissima Francia. Altera Gallicana minor, complexa totam ferè Germaniam secundam, maximamque utriusque Belgicæ partem, quæ primis Francorum Regum armis, superato Rheni limite, parta regni sedes, ex quo regni Francici sedes Dispargo Cameracum proiecta est. Gallicana major, postquam feliciore armorum successu interior quoque Gallia à Clodoveo rege adjecta, regnique sedes à Francis Parisiis collocata fuit, cœptumque regnum Francicum in Neustriam & Austrasiam, in Occiduam videlicet & Orientalem Franciam dividi. Quarta Francia nova, seu Orientalis Germania, quæ novo armorum & fortunæ cursu, debellatis Alemannis accessit ad Austrasiam regnum, in eaque Franconia, quæ ab his victoribus Francis nomen retinet. Tantum abest, ut Franconia prima Francorum sedes fingi possit. Ampla scriptionis materia, quæ historiæ servatur. Hic paucis indicare vifum, dum ex hoc progressu Francorum Regum monumenta Franciæ introducimus.

2. UBI WARNA.] In diplomate Ludovici Germaniæ Regis, & Caroli M. nepotis, anno xxxiii. regni ejus in Orientali Francia, dato Herivordensi monasterio, eo, quo hodie, nomine *Werna* appellatur. Auctori vitæ Caroli M. apud Pithæum, dicta *Warana*, Adelmo *Waharna*, Annalib. Francor. apud Reuberum *Wagarna*, apud Canisium *Vinharna*, Reginoni *Waabna*, Poëtæ Anonymo *Warna*, qui Hervordiâ urbe permeatâ ad pagum Remen Visurgi infunditur. Ab hoc *Warna* nonnulli denominatos volunt *Varnos* seu *Varinos*, populum Cornelio Tacito in Germania, & Procopio lib. 4, hist. Goth. memoratum. Alii aliunde.

liunde hujus gentis nomen arcessunt. Quod nos in medio relin-
quimus.

3. SAXONE.] Saxonum populus haud secūs quām Francorum , ex parvis initiis ad magnam potentiam per inferioris Germaniae provincias emersit , succēsītque in gloriam Francorum , ac priūs etiam Saxonum nomen , quām Francorum auditum , traditumque à Ptolemæo . Eò gentis origo non minūs quām Francorum obscura , multisque fabulis involuta à scriptoribus .

Widichindus Corbeiensis vetus ad Visurgim scriptor , inqui-
rēdo gentis incunabula , dum certa tradere voluit , fabulis præ-
lūsīt. Ita enim lib. 1. Annal. Saxonum origines alii à Danis &
Normannis , alii à Macedonibus deducunt ; sibi autem certum ,
inquit , navibus advectos Saxones in Hardolaun , quæ aliis Ha-
deleria , locus in Archiepiscopatu Bremensi ad Albis ostia . Quo
verò tempore , aut unde , qualesve illi advenæ fuerint , ipse æ-
què incertus non exp̄eslit. Hinc alii arrepto fabulæ indicio , ex
Macedonia multò liberius finxerunt , & profugam partem ex A-
lexandri M. exercitu , cum 300 triremibus appulisse in ostia Al-
bis , factaque excursione Thuringos fugasse , eorumque exinde
terras insedisse. Canoræ nugæ , quæ nullum fidei indicium apud
ullum priscum probatumque auctorem reperiunt.

Alii deinde cum eandem sibi fingendilicentiam patere con-
spicerent , Saxones à *Sagis* seu *Sacis* Asiæ populis deduxerunt.
Hæc Peaceri , Reineccii , Furmerii , Cisneri , Letzneri , aliorum-
que opinatio , quam magno quidem plausu , sed nullo alio argu-
mento obtrudunt , quām ex nominis quadam similitudine , quæ
inter *Sacos* & *Saxones* se obtulit. Quo figmenti genere alii apud
Crantzium Saxones à *Saxona* fluvio in Moldaviam se exoneran-
te arcessunt , quos origine alii Boios , alii Gallos comminiscun-
tur : verūm hæc commenta retulisse inter doctos , refutasse est.
Ad quorum figura referas Saxonem Grammaticum , Suffri-
dum Petri , Furmerium , ipsumque Crantzium , apud quos
multis ante Christi natalem sœculis Saxones maria navigant ,
commercia , foedera , bella , connubia agitant cum Danis , Sue-
vis , Finnis , Britannis , Frisiis , quæ nonnisi ex traditis vulgi fa-
bulis

bulis, sine ullo probato antiquitatis auctore, ad vulgi oblectamenta narrantur. At Lucanus Poëta, inquiunt, jam ævo suo Saxonum meminit:

Et Biturix, longisque leves Saxones in armis.

Falluntur, non Saxones, sed Axones & Auxones, aut Suefones sunt, ut cum Turnebo meliores legunt. Quos verò Egefippus lib. 5. c. 15: de bell. Jud. ex oratione Josephi Saxones introducit Vespasiani ævo, ad Gratiani Cæsaris tempora spectant, quo Cæsare auctor scripsit, accommodavitque suo sæculo Saxonum & Scotiæ nomina.

Primus ergo qui Saxonum meminit Ptolemæus est, ut diximus. Collocat is gentem hanc lib. 2. geograph. apud Cimbriam Chersonesum, eo loco, ubi nunc Holsatia est. Vixit Ptolemæus, teste Suidâ, Antonino Pio Imperatore, cuius imperii initia circa annum CLXI. Indè ad Diocletiani tempora nihil memorabile de Saxonibus. Eo Cæsare, uti Eutropius refert lib. 9. c. 15. littora Belgicæ & Aremoricæ, ipsamque Bataviam piraticis infestare cœperunt. Celebres posthæc, & Juliano cumpromis Cæsare, ab Amisii ostio omnia maris littora obsederunt, Gallico adeò infesti, ut totum illud littus ad Garummam fluvium *Saxonicum* dixerint, Duceisque *saxonici littoris*, qui vim piraticam arcerent, imposuerint Romani. Inter primos Valentinianus Cæsar impetum stitit, uti hæcab Orosio lib. 7. c. 32. Zosimo lib. 3. & Apollinari lib. 13. c. 6. perscripta sunt. Valuit Saxonum vis dominatu maris à Diocletiani ævo ad Theodoricum primum Austrasia Regem, postquam ejus armis vieti exactique ex Austrasia, terrâ simul per eas regiones, quæ Saxonum postea nomen induerunt, invalescere cœperunt. Valentiniano III. Imperatore, unâ cum Juttis & Anglis Britanniam invasere, sub idem ferè tempus, quo Franci Galliam. Ita duæ Germanæ gentes terrâ marique nova sibi regna extra Germaniam armis peperere.

Igitur ut veram Saxonum originem reddamus, assveranter dicimus, Saxones Germaniæ indigenas, &c, quod jam plerique re melius exploratâ sentiunt, *αὐτοχθόνες* esse, haud secus quam

M

de

de ipsis Francis à nobis assertum est. Hæc Crantzii in præf. in Sax. Conradi Celtis, Althameri, Wilichii; Cluverii & aliorum sententia est. Figmenta enim ingeniорum sunt, qui vel advenas ex Macedonia, vel ex Africa, vel aliunde arcessunt. Quod enim Tacitus certissimus accuratissimusque scriptor universim de Germanis nostris lib. de mor. Germ. pronuntiat: *Ipsos Germanos indigenas crediderim, minimeque aliarum gentium adventibus & hospitiis mixtos*; id quemadmodum de cæteris Germaniæ transrhenanæ populis plerique sentiunt, ac nos de Francis ostendimus; ita de Saxonibus persuasum habemus. Hic jure possessionis pedem figimus, donec prodeant, qui aliud nos certius doceant. *Quin Tacito id adeò persuasum fuit, ut repetierit: Ipse eorum opinionibus accedo, qui Germania populos nullis aliarum gentium connubiosis infectos, propriam & sinceram, & tantum sui similem gentem extitisse arbitrantur.* lib. de mor. Germ.

Unum his opponitur, in quo refellendo multi laborant. Si indigenæ, inquiunt, sunt Saxones; & primâ origine Germani; cur eorum nulla apud Cæsarem, Tacitum, Plinium, Strabonem, aliosque ante Ptolemæum mentio? Crantzus ut id expediat, Cattorum nomine Saxones comprehendi censuit, & Saffos quasi Cattos à Tacito scribi assérerit. At Saxones à primo ortu maritimi fuere, & trans Albim collocantur à Ptolemæo. Catti verò mediterranei sunt, & ad Visurgim se porrigunt. Pideritius in Chron. Lipp. Chaucorum nomine designari opinatur. Sed nec illi trans Albim ad Cimbricam Chersonesum rectè investigantur. Proprius verò accessit Cluverius l. 3. antiq. Germ. cap. 21. quos enim Tacitus Fosos recenset medios inter Cheruscos & Cimbros, per hos ille Saxones designari contendit, quod eodem loco Ptolemæus antiquissimæ originis Saxones visus est collocare. Quanquam non desint, qui Anglorum nomen à Taciti ævo in Saxonum commutatum velint; perinde ac Francorum & Alemannorum nomen à diversis populis assumptum est. Tantum antiquitus Angli & Saxones una ad Albim gens fuerit: Nam Anglos hosce Tacitus ultimos Suevorum facit, collocatque infimos ad Albim, ubi & Saxonum sedes à Ptolemæo assignatur.

gnatur. Adhæc Angli celebris per id tempus gens in Germania fuit, quæ sicuti primaria viætæ Britanniæ nomen imposuit. Ideoque Beda lib. 1. cap. 15. *Tunc Anglorum sive Saxonum gens, invitata à Rege Vortigerio, in Britanniam tribus longis navibus advehitur: veluti Anglorum & Saxonum gentem unam faceret.* Sed cum idem Beda post se planiū exprimat, dicatque: *Advenierant autem de tribus Germania populis fortioribus, id est Saxonibus, Anglis, Vitis, seu ut alii legunt, Fitis, iisque postea diversas Britanniæ partes & provincias assignet, in quibus singuli possessionem ceperant, fatis tres diversi populi recognoscuntur.* Ac Saxones quidem etiam ævo illo ad Visurgim, & trans flumen sedes suas habuisse dixerim, quando in ea regione, quæ post Westphaliæ nomen obtinuit, scriptores plerique tam prisci quam recentiores, antiquos Saxones deponunt. Igitur vicinorum quidem & confinium, sed diversorum populorum unum id. fœdus, unaque belli societas fuit. Nec verisimile est, ab una Anglorum gente, quæ tum angustis adhuc terminis continebatur ad Albim, universam Britanniam subigi potuisse, aliâ semper atque aliâ belli sobole & multitudine è Germania per mare evocatâ. Quæ certius cognoscentur, si quis superiora bella revolverit, quibus à Diocletiani ævo mare simul piraticis infestum habuere, & Bataviam Galliæque oras occupaverunt, tam ex Visurgis quam ex Albis ostio inventi.

At gentis nomen quo Saxones dicuntur, unde inditum? Rejeeti suprà, qui à *Saxis* ducunt; nec minus explosoris Suffridum Petri, qui lib. 2. de orig. Frison. cap. 5. tres nobis duces Macedonici exercitus finxit, Saxonem, Frisonem, & Brunonem, Hadoleriam appulsos, à quibus Saxones, Friones & Brunwicenses gentium nomina retineant. Sed hæc commenta sunt, quibus auctor ille cætera quoque scripta sua liberaliter respersit. Certius illi, qui à longis cultris gladiisque, quos *Sahs* patriâ lingua dixeré, quibusque accinæti ibant in prælia, nomen genti adhæsisse tradunt, haud secus, quam à *quiri* hastili, *Quirites* appellati. Hæc Widechindi Corbeiensis, Gregorii Turonensis,

M 2

Gobe-

Gobelini nostri, Lipsii, Meibomii, Engelhusii sententia, quam dudum hoc versu consignavit Viterbiensis:

*Ipsé brevis gladius apud ipsos SAXA vocatur,
Unde sibi nomen SAXO peperisse notatur.*

Quanquam hæc non tam de nomine contendere velim, cùm multa ejusmodi nomina fortuitò indita sint, quando de Saxonum origine inter recentiores convenit, eam non aliunde, quàm ex indigenis Germanis arcessendam esse: et si apud Tacitum nulla Saxonum mentio sit, plures ille Germanorum gentes præteriit, quæ à posterioribus demum scriptoribus proditæ; quales Turcilingi, Heruli, Scyri, aliaque, quas Odoacer aliquæ barbari Germanorum Reges in imperium invexere, claræ tunc demum, postquam bella aperuere. Id potius ex vetustis scriptoribus requirimus, quàm bellicosa Saxonum gens fuerit.

Zosimus lib. 3. *Profectò Saxones omnes eas regiones incolentium barbarorum, & animi & corporum viribus, & laborum in præliis tolerantiam fortissimi.* Haud dissimilia Orosius lib. 7. c. 32. & Paulus Diaconus perscripserunt: *Saxones esse gentem in Oceani littoribus & paludibus inviis sitam, virtute & agilitate terribilem.* Cætera eorum res terræ marique gestæ comprobant: Nam quâ tempestate Franci, eadēm Saxones invalueré, quantumque Franci perrupto Rheni limite depulsisque Romanis protulère per Galliam regni fines, tantum Saxones, transito Albi & Visurgi, se per inferiorem Germaniam explicaverunt; tanquam alterius gentis fortuna cederet locum alteri, in imperium Romanum aliquando successuræ: sensimque in eam provinciarum amplitudinem emer- serunt, ut Saxoniam triplicem fecerint, aliam Ostphalorum, aliam Angrivariorum, aliam Westphalorum; qui postrem etiam antiquorum Saxonum nomen obtinent apud Bedam, Marcellinum, D. Bonifacium, & Gregorium Pontificem ad *Altsaxones* scribentem, nec alii à recentioribus scriptoribus agnoscuntur. Quanquam harum regionum populi non tam vicii armis Saxonum, quàm quòd ultro in foedus & Saxonum nomen concederint; qui que priùs diversis nominibus Sicambri, Attuarii, Ampsivarri, Cherufci, Marfi, aliique dicebantur, iidem.

dem post exuto Francico nomine in Saxonum nomen & Rempubl. transferunt, donec ferocissima gens a Carolo M. postremum debellata Christi religionem fusciperet, ac Francorum imperio trans Rhenum exspirante, Henricus Auceps & Otto M. imperium ad populares Saxones transferrent. Ita vero bellicose harum regionum gentes Franci & Saxones, extinctis Gothorum, Wandalorum, Longobardorum, Alemannorum, ceterorumque barbarorum per Europam regnis, constantissimum ac validissimum imperium tenuere, Francis per Galliam & Italiam, Saxonibus per Germaniam transrhenanam & Britanniam terrae marique dominantibus; tanquam Virtus & Fortuna semper inter hos contendisse videantur. Quo nescio quid ad gentis nostrae gloriam aut illustrius inter monumenta posteritatis memorari, aut dignius aliquando post haec præludia nostra excoli poslit.

4. **PIPINUM FUSO SPECTAVIT OVANTEM.**] Quod Annales Francorum apud Reuberum nos docent: *Hoc anno, DCCLIII. Pipinus Rex cum exercitu magno Saxoniam ingressus est: & quamvis Saxones ei obstinatissime resisterent, pulsi tamen cesserunt, & ipse usque ad locum Rimi, qui est super Wisaram, accessit. In qua expeditione Hildigarius Archiepiscopus interfactus est in monte, qui dicitur Viburg. Eadem pene habet ad hunc annum Aimoinus.*

5. **R.E.M.A.]** In Annalibus Francorum, quos modo attulimus, *Rimi* nominatur. In Aimoino legitur: *At ipse, Pipinus, usque ad locum qui dicitur Rum, qui est super fluvium Wisaram, accessit, in qua expeditione Hildigarius Archiepiscopus interfactus est in monte qui dicitur Diburg. In Adonis Viennensis Chronico habes: Mox Pipinus Rex Francorum factus, bellum in Saxoniam movit: in quo Childegarius Episcopus a Saxonibus occisus est in castro Witberg. Victor Pippinus pervenit usque ad locum qui Rhime dicitur. In vita Caroli M. apud Pithœum, & Chron. Reginonis, *Rimia*, in Annal. Francorum apud Canisium *Rimee*, in diplom. S. Henrici Imp. An. mXXII. *Rimi*, & in literis B. Meinwerci super fundat. Monast. in Abdinghoff An. mXXXI. datis, *Rime*, hodie Nemen nuncupatur, ad Wernæ & Visurgis confluentes in Comitatu Ra-*

venspergio, & Flotana præfectura non ignobilis vicus. Habuit olim cœnobium monialium titulo Vallis benedictionis, fundatum An. MCCLVIII. de cuius translatione vid. Crantzii Metrop. lib. 8. cap. 9. & Hamelmanni Chron. Oldenburgense parte primâ cap. 21. ita Meibomius in not. ad Irmensulam. Hic etiam generalem conventum à Ludovico Rege Germaniæ An. DCCCLII. habitum putant, qui in Annal. Francorum apud Pithæum & Reuberum, loco *Nimia*, *Rimia* legunt, cùm in ripa Visurgis nusquam sit *Nimia*, sed procul inde distet, si quidem Nihemium oppidum diœcesis Paderb. eo nomine intelligatur. Verba sunt hujusmodi: *Igitur in loco, qui appellatur Nimia, super amnem, quem Cornelius Tacitus scriptor rerum à Romanis in ea gente germanarum, Visurgim, moderni verò Wisuracha vocant, habito generali (Saxonum) conventu, tam causas populi ad se perlatas justo absolvit examinatione, quam ad se pertinentes possessiones, judiciorum gentis decreto recepit.*

6. **HILDIGARIQUE NECI VICTRICIA CASTRA SECUTI.**] Hildigarii, Archiepiscopi Colonensis cædem, Francorum Annales ad unum omnes, quos & ego præ aliis sequor, in annum CCCLIII. conjiciunt, ex quibus Fuldenses ita narrant: *Pipinus iterum Saxonum perfidiā provocatus, regiones eorum devastat: in qua expeditione Hildigarius Colonensis Archiepiscopus à Saxonibus interimitur.* Locum necis designat Aimoinus Duburg, Annales Francorum apud Reuberum vocant *Viburg*, Annal. Canisiani *Castrum Viberg*, Ado Viennensis *Castrum Witbergh*, Regino *Nigberg*, Gerhardus Cleinsorgius *Iborg* interpretatur, castrum diœcesis Osnabrugensis. In vetustis Colonensium tabulis apud Cæsarium Heisterbacensem dicitur *mons Wiburg*. Quem Meibomius in notis ad Irmensulam, & Bernardus Malincriodus, Decanus olim Monasteriensis, non minus doctrinâ, quam genere nobilis, lib. 2. de Cancellariis cap. 1. asserunt esse montem *Wedenberg*, hunc Bernardus Luderus in encomio urbis Mindæ, *Montem Vedegonis* appellat, horarii itineris spatio ad Visurgim, non procul Rhemâ, supra Mindam situm. Cæterum Hildigarium Carolus M. sepelivit in monte *Ovesberg*, teste Henrico de Hervordia lib. 2. c. 69. Quem *pro constantia fidei* & re-

& regni, Petrus Mersæus Cratepolius ait, *ab hostibus cæsum fuisse*: De anno obitū pluribus agit Ægidius Gelen. in Hierotheca Engelbertina.

Non immeritò hīc quispiam requiret, quid Episcopi in castris, quid in bellis egerint, quorum vita Deo consecrata est ad cultum divinum, ad Cleri populi curam, utque gregi suo præsentes ac vigiles adsint? Alia illis militia præscripta est, in sacra toga, non militari sago. Arma eorum quibus pugnant pro Ecclesia Dei, quotidianum pro Regibus & populo sacrificium, publicæ statèque pro grege preces, libri sacri, ex quibus verbum Dei doceant, sacri Canones, ad quorum præscripta regant, sacrorum administratio, & quæ ejusmodi in hanc rem objici solent, imperitè magis, quam prudenter. Quasi verò militia non sit etiam congregatio Christianorum hominum, quibus & hæc arma & subsidia Sacerdotum præstò esse debent in castris & bello, haud secus quam alii, qui domi remanent, & pro quibus milites pugnant. Ideò religiosissimi Reges & Imperatores sibi Episcopos, ut sacrorum præfides, & castrorum Sacerdotum moderatores adesse voluerunt, Sacerdotes verò tanquam animarum curatores, qui Sacraenta militibus administrarent. Quam in rem, ut cætera prætermittantur, sistimus Concilium Germanicum, auctoritate Zachariae Pontificis, per Legatum ejus D. Bonifacium Archiepiscopum, Ratisbonæ sub Carolomanno Majore Domus, Caroli Martelli filio, & Caroli M. patruo xi. Kal. Maii, An. Christi DCCXLII. habitum. Ita enim Can. II. ejus Concilii prescribit: *Servis Dei per omnia armaturam portare vel pugnare, aut in exercitum & in hostem pergere, omnibus prohibuimus, nisi illis tantum, qui propter divinum mysterium, Missarum scilicet solemnia adimplenda, & Sanctorum patrocinia portanda ad hoc eleiti sunt: Id est unum vel duos Episcopos, cum Capellani & Presbyteris eorum, Princeps secum habeat, & unusquisque Praefectus unum Presbyterum, qui hominibus peccata confitentibus judicare, & indicare penitentiam possit.* Concil. General. tom. 17. Othlonus in vita D. Bonifac. lib. 1. c. 41. & 42. Willibaldus cap. 10. Serarius lib. 3. not. 31. Benedictus Levita lib. 5. in præfat. Baron. ad An. DCCXLII. Surius

rius in vita D. Bonifac. Nauclerus generat. 25. aliique de hoc celebri Episcoporum concilio.

Jam ante Hildigarium Coloniensem Episcopum, amiserat Moguntia Geroldum Episcopum suum in bello cæsum, uti ab Othlono relatum lib. 1. c. 41. Vastantibus quippe Thuringiam Saxonibus, Geroldum Moguntinum cum exercitu misit Carolomannus, quo in prælio cecidit Episcopus cum aliis. Id factum ut excusat Serarius, soliti, inquit, *fuere hi Principes etiam Episcopos ad bella, præsertim quæ contra infideles gererentur, quasi sacra forent, ducere; sed modum, & commissum Episcopi munus prætergressus videtur Geroldus, qui miscendo se præliantibus, arma induit.* Ideò in Ratisbonensi Synodo hæc præscripta, confirmataque mox in Liptenensi Concilio. eò inter Canones illos relatum: *Interdicimus servis Dei, ne pompaio habitu, vel sagis, vel armis utantur. Quæ & Bonifacius epist. 105. ad Cudbertum Archiepiscopum à se cæterisque Episcopis statuta fuisse perscribit.*

Post ubi res ad priorem libertatem rediit, multique Episcopi, deserto grege suo, castra denuo secuti sunt, questus ipse populus supplicem Carolo M. libellum porrexit, hisce verbis, quæ ex Capitulis Carolinis Wormatiæ decretis recensentur: *Flexis omnes precamur poplitibus Majestatem vestram, ut Episcopi deinceps, sicut hactenus, non vexentur hostibus, sed quando vos nosque in hostem pergitim, ipsi propriis resideant in parochiis, Deoque fideliter formulari studeant, & eorum sacra sancta mysteria canonice & Deo placite peragere sat agant, atque pro vobis ac cuncto exercitu vestro, unâ cum omnibus sibi commissis orare viriliter, Missasque decantare, & Litanias atque eleemosynas facere decenter. Quosdam enim ex eis in hostibus & præliis vulneratos vidiimus, & quosdam periisse cognovimus. Hec vero valde periculosa, & oppido sunt cavenda. Quæ idcirco suggerimus, ne pro talibus vos & nos simul pereamus. Et quæ in hunc modum libellus supplex exponit, lib. 6. c. 285. Capitulorum, tom. xx. Concil. General.*

Ad ea respondit Carolus, promptum se quidem esse justæ petitioni satisfacere, sed hæc prius ad proximum synodalem conventum ac generale placitum, ubi plures Episcopi & Comites convenerint, referenda

renda esse. Igitur proximo Episcoporum & Comitum convenitu hāc lege sancitum: *Carolus Dei gratiā Rex, Regni Francorum rētōr, devotus sancte Ecclesiæ defensōr, atque adjutor in omnibus; Apostolice sedis hortatus, omniumque fidelium nostrorum, ac maximē Episcoporum ac reliquorum Sacerdotum consultu, servis Dei per omnia omnibus armaturam portare, vel pugnare, aut in exercitum & in hostem pergere omnino prohibemus, nisi illis tantummodo, qui propter divinum ministerium, Missarum scilicet solemnia adimplenda, & Sanctorum patrocinia portanda, ad hoc electi sunt.* Id est, unum vel duos Episcopos, cum cappellani presbyteris, Princeps secum habeat, & unusquisque Praefectus unum presbyterum, qui hominibus peccata confitentibus judicare, & indicare pānitentiam possit. lib. 7. Cap. Carolin. c. 91. tom. xx. Concil. General.

Ita verò Canon Ratisbonensis Concilii repetitus, & quod à Carolomanno patruo, id auctoritate quoque Caroli M. sanctum est. Sed non eo contentus Carolus M. aliā post lege hāc multò dilucidiū sanxit. Referam decreti verba. Secundā vice propter ampliorem observantiam, *Apostolicā auctoritate, & multorum Sanctorum Episcoporum admonitione instructi, sanctorumque Canonum regulis edicti, consūltu videlicet omnium Nobilium nostrorum nosmet ipsos corrigentes, posterisque nostris exemplum dantes: volumus, ut nullus Sacerdos in hostem perget, nisi duo vel tres tantum Episcopi, electio ne ceterorum, propter benedictionem & predicationem, & cum illis electi Sacerdotes, qui bene sciant populi pānitentias dare, Missas celebrare, de infirmis curam habere, sacratique olei cum sacris precibusunctionem impendere, & hoc maximē providere, ne sine viatico quis de seculo recedat.* Hi verò nec arma ferant, nec ad pugnam pergent, nec effusores sanguinum, vel agitatores fiant, sed tantum Sanctorum pignora, & sacra ministeria ferant, & orationibus pro viribus insistant, ut populus qui pugnare debet, auxiliante Domino, vīctor existat, & non sit Sacerdos sicut populus. Reliqui verò qui ad Ecclesias suas remanent, suos homines bene armatos nobiscum, aut cum quibus jusserrimus, dirigant, & ipsi pro nobis, & cuncto exercitu nostro Missas, Litanias, oblationes, eleemosynas faciant, orantes Deum cœli, ut proficiamus in itinere quo pergimus, vītoresque Deo adminiculante existamus. Gentes enim &

N

reges

reges earum, quæ Sacerdotes secum pugnare permiserunt, nec prævalebant in bello, nec victores extiterunt, quia non erat differentia inter laicos & Sacerdotes, quibus pugnare non est licitum. Hec enim Galliarum, Spaniarum, Longobardorum, nonnullasque alias gentes, & reges earum fecisse cognovimus, qui propter prædictum nefandissimum scelus, nec victores extiterunt, nec patrias retinuerunt. Quam foveam carentes, malum cum paucis & licitis, Domino opem ferente, victores existere, quam cum multis & illicitis terga, quod abstinet, vertere, & cum prædictis gentibus perire. Qualis enim victoria datur, ubi Sacerdotes unâ horâ Dominica pertractant Mysteria, & Christianis Dominicum porrigitur Corpus pro suarum animarum redemptione, & post Christianos, quibus hoc ministrare debuerant, aut paganos, quibus Christum predicare, propriis sacrilegisque manibus necant? Ita Carolus M. religiosissimus Imperator, quemadmodum hæc inter ejus Capitula & decreta recensentur ab Andegiso l.7. c. 103. & tom. xx. Concil. General.

Quâ præclarâ Caroli M. constitutione multa ad omnem posteritatem memoranda traduntur. Nam præter solitudinem, quam pro militibus suis gessit, ne quis miles inter bella negletus, & Sacerdotum ope destitutus periret, tum vel maximè Episcoporum auctoritatî consultum voluit, ne suo imperio Episcopum quempiam ad castra evocaret: sed quem libera inter ipsos electio, aut Metropolitani judicium ad id castrense munus admoveret. Dum verò cæteros Episcopos, qui domi ad Ecclesiæ remanent, hortatur Carolus, ut homines suos bene armatos submittant ad exercitum, satis opinor comonstrat, quæ tum etiam Episcoporum potentia fuerit. Nec modò Geroldus Moguntinus Episcopus, sed & cæteri suo milite, suoque ductu cum regio exercitu processerint ad bella adversus Paganos, quæ ob id sanioribus deinde legibus coercita sint. At nihil in hac constitutione illustrius, quam recognoscere, quam Carolus M. religionem coluerit. Reperias enim hâc tempestate, qui Carolum M. Catholicam cum Romano Pontifice religionem colluisse negant, quique id editis etiam hac super re libris per summam, nescio, infamiam, an impudentiam dicam, persuadere volunt.

volunt. Hic ego ut prætermittam, quam familiaritatem & conjunctionem religionis habuerit Carolus M. cum Hadriano Pontifice tot annis, quam cum Leone; quā observantiā Romanam sedem veneratus, ut ob id quater Romam profectus sit ad limina Apostolorum invisa; quo cultu religionis Episcopatus Saxoniæ, collegia Sacerdotum, & cœnobia Monachorum instituerit dotaritque, & quæ innumera sunt ejusmodi. In præfens ad hæc Caroli decreta illos revoco. Intelligent hic sacrificium Missæ prisco majorum ritu, Episcoporum venerationem, discrimen inter Episcopos & Presbyteros, Sacerdotum potestatem in judicando absolvendoque, poenitentiam quæ confitentibus injungitur, sacri Olei unctionem, ne quis sine viatico hac exeat è vita, oblationes ad altare, Sacerdotalem benedictionem, Litanias, & in his Sanctorum invocationem, Divorum patrocinia ex cultu pignorum, quæ ob id in bello etiam circumferebant, Corpus Dominicum etiam sub una specie præbitum militibus. Antiqua hæc, ex quo Saxonia Christi religionem primùm à Carolo accepit, indè ad nos continuâ successione Episcoporum, & perpetuitate religionis tradueta; sed tam diversa & discrepantia à nova hujus sæculi doctrina, quā heterodoxi à Catholicis, falsum à vero disjunguntur. Quātò nunc æquiū ejusmodi scriptores, ac magistros novarum religionum, illo D. Hieronymi pronuntiato, ex epistola ad Pamachium & Oceanum, convenias. *Quisquis assertor es novorum dogmatum; queso te, ut parcas Romanis auribus, parcas fidei, quæ Apostolico ore laudata est. Cur post quadringentos annos docere nos niteris, quod antè nescivimus? Usque in hanc diem sine vestra illa doctrina Christianus mundus fuit.* Mille & sexcenti sunt anni, ex quo orbis Catholicus à Christo & Apostolis, octingenti sunt anni, ex quo Saxonia per Apostolicos viros, & Episcopos à Carolo M. introductos, hanc Catholicam fidem accepit. Igitur ut S. Hilarius lib. 6. de Trinit. tardè hos Doctores etas nunc hujus sæculi protulit, sero hos habuit fides mea, & omnium Majorum nostrorum.

7. FORTIS ET EXEMPLUM CAROLI.] Caroli M:
paternis vestigiis inhærentis expeditionem ad confluentes

N. 2 Wer-



Wernæ & Visurgis, literis consignavit ad annum DCCCLXXXIV. Adelmus: *Rex autem congregato iterum exercitu in Saxoniam profectus est, celebratoque in castris natalitio Domini die, supra Ambram fluvium in pago Huthagoë, juxta castrum Saxonum, quod dicitur Skidrobburg, ad locum vocabulo Rum, quo Wisura & Waharna confluunt, populabundus accessit, &c.* Eadem ferè habent Annal. Francor. apud Reuberum. Et auctoꝝ vitæ Caroli M. apud Pithæum ait: *Inde abiens in Saxoniam, pervenit ad Rimia supra fluvium Wisora, ubi confluit Warana.* Annales Canisiani: *Tunc dominus Rex Carolus supradictum iter peragens, usque ad Rimee pervenit super fluvium Wise-rama, ubi confluit Virharna.* Regino: *Pervenit super fluvium Wisaram, ubi confluit Waahna.* Poëta Anonymus:

— processit ad osia Warne.

Quā fluit in Wisuram.

8. GENITORIS AVIQUE.] Superiorum Franciæ Regum bella cum Saxonibus gesta paulò antè attigimus, nunc de Caroli Martelli, & Pipini ejus filii expeditionibus breviter agamus. Et quidem Carolus Martellus Anno DCCXXI. *Saxones vastavit.* Annal. Fuldenſ. Et Anno DCCXXXVII. eosdem tributarios fecit. Annal. Pithæi. Anno autem DCCXLV. *Carlmannus & Pippinus simul Saxonum perfidiam, vastat à eorum regione, ulciscuntur.* Annal. Fuld. Anno DCCXLIX. Pippino per Thuringiam ingresso Saxoniam supra fluvium Obacra, in loco qui dicitur Horoheim, Saxones occurrunt, &c. Annal. Pithæi. Anno DCCLI. Pipinus iterum Saxonum perfidiâ provocatus regiones eorum devastat. Annal. Fuld. Annales Franc. apud Reuberum, Aimoinus. Anno DCCLVIII. *Pipinus Rex in Saxoniam, ibi & firmitates Saxonum per virtutem introivit, in loco, qui dicitur Sithma.* (Regino Sitina vocat, hodie Süßen / in diceceſi Monasterensi Nobilium de Ketteler sedes, nuncupatur.) Annales Francorum apud Canisium. Et vičtis Saxonibus tributum imposuit, ut trecentos equos singulis annis sibi solverent. Annal. Franc. apud Pithæum & Reuberum, Aimoinus. Quemadmodum olim quingen-tas vaccas inferendales à Clothario seniore, Clodovei filio, Chilperici patre, regia mensa inferre iussi fuerant, que ideo inferendales dicebantur, quod singulis inferrentur annis. Aimoinus l. 4. c. 26. Fredegarius Scholasticus c. 74.

9. QUAM

9. QUAM QUOD RHEMORUM.] Henricus de Hervordia lib. 2. c. 69. affirmat *Reme* à Carolo M. templum esse conditum, locoque nomen inditum à *Rhemis*, urbe Archiepiscopali in Galliis, quod Meibomius facile se credere ait: fuisse enim familiare Carolo M. peregrina nomina nostris locis inferre. Sed ego potius à superioribus Francorum Regibus ad Visurgim beligerantibus, quam à Carolo M. *Reme* hoc nomen impositum crediderim; cum satis sit cognitum, jam ante Carolum M. *Reme* nomen ad confluentes Wernæ & Visurgis extitisse. Hæc de *Reme*; quæ licet ad Paderbornenses propriè non pertineat, quia tamen Dioecesis nostræ fines proximè contingit, & Mindensis Ecclesia pristinæ dignitatis statum, fatali rerum hoc sæculo conversione, jam amisit, jure vicinitatis eam nobis, quoad fas est, vendicamus.



N 3

ERES